


湖廣通志

列女

七十二

内閣文庫	
番號	漢 14208
冊數	100 (68)
函號	奥 130 1





湖廣通志卷之七十二

列女志有附增

寶慶府

〔明〕夏寅妻董氏〔明〕一統志邵陽人寅舉鄉試卒氏年二十無子妾劉氏年十八遺腹生子同心苦節撫孤成立以壽終

謝彬妻馬氏彬為邵陽諸生蚤世遺腹生子弼家故貧氏堅守志撫教其孤後弼以明經謁選氏年已七十三孀居五十餘年門戶肅然

黃洪妻龔氏邵陽人天順三年守節壽臻百歲詔旌其門

康門畢氏王氏邵陽人逸其夫之名畢年二十夫故遺腹生子敬德矢節育孤備盡艱辛敬德爲諸生畢七十餘歲終當事旌之敬德之子天其婦王亦以節著以上舊志劉大廷妻余氏明一統志新化人其夫方病劇泣而不言氏以死自誓撫子成名

畢承宗妻吳氏新化人承宗年十七聘氏未娶中天順巳卯鄉試旋卒舟中訃聞氏曰吾巳爲畢家婦矣夫有科名我更何顏他適乎遂屏膏沐守貞以老

曾步孔妻羅氏新化人年十八而寡守節自誓刻木爲夫像事如生詔旌其門

李白融繼妻伍氏新化人年少矢志撫前妻二子如巳

出茶苦霜潔詔旌之

黃詔妻鄒氏新化人生子二歲夫病寢篤作詩曰願妻莫把蛾眉掃好看吾兒節更堅及卒氏年二十三矢志鞠子每晨夜誦其故夫之句嗚咽不自勝年八十三卒

以上舊志

段思禮妻鄒氏明一統志武岡人思禮早世氏年二十四撫子肅領鄉薦景泰中事聞旌表

李錄妻楊氏明一統志武岡人錄爲諸生氏歸甫八月錄病顛天割股比卒氏年十九矢志守節有司歲以官租贍之

趙鸞妻蕭氏武岡人鸞爲諸生早卒氏年十九父母欲

奪其志割耳斷髮自誓年八十八歲卒奉詔建坊

鄧祥泰妻劉氏武岡人生一子未期祥泰卒氏年方十

七舅姑憫其少諷以改適氏剪髮自誓撫孤成立卒年

九十七見孫四曾孫五皆為名諸生

雷澤妻鄧氏新寧人澤為諸生家素貧氏年二十一而

寡事姑孝謹教子繼武以明經任教授卒年九十七有

司奏聞旌表

王啟妻鄧氏新寧人年二十守節養姑鞠子清苦自甘

壽躋百有三歲

李鳴梓妻鄧氏新寧人家最貧窶僅一年夫卒遺腹生

子可祥斷髮誓志慈孝兩全繞膝孫八人曾孫十八年

九十終

車萬合妻唐氏邵陽人進士唐興仁之孫女萬合鄉舉

第一人數年卒氏年二十號慟不欲生萬合之父妾劉

氏亦年二十而寡涕泣勸以撫孤繼志乃止後課子鼎

黃學成中乙榜家政肅然聞者咸敬以上舊通志

張志臣女三楚文獻錄邵陽人名同桂幼許字楊世昌

世昌病斃兩家父母不欲昏女不從密白其大母願歸

世昌既知內外咸欲奪其志私檢得聘書懷之夜從樓

中下投池水死年十有五矣萬曆間御史以狀聞旌其

墓門曰烈女

胡氏三楚文獻錄邵陽人農家女也適王某居近江干

以耕桑爲業萬曆庚子江水夜中驟漲避水多不及衣者氏必整衣以行水益大至叔冒險來救氏閉目搖手曰汝勿羸近我叔不敢前氏曰溺死愈於羞死遂被溺叔附一木僅免水退氏危立如生云

劉源澄妻莫氏邵陽人獻賊之亂源澄以邑諸生奉檄督鄉團復城不克死之氏聞呼呼數日夜柩至大慟而絕人謂夫義婦烈云

諸生梁大新妻陶氏城步人大新卒氏年二十一號泣自刎同日葬於象鼻山

諸生王萬年妻陶氏城步人獻賊肆掠萬年偕氏及子女避山中爲所獲氏義不受辱厲聲罵賊一家俱遇害

諸生劉弘功妻蕭氏武岡人夫卒氏年二十有營弁逼娶氏給以改粧入室割耳及鼻血流滿面弁驚逸氏苦節終身

諸生劉孔安妻龍氏武岡人夫卒號慟殮畢遂自經於柩側

林登瀛女菊秀新寧人許字孫敬聞敬溺水不拯遂闔戶自經

朱養正妻蕭氏武岡人袁寇之變氏在母家被獲以騎逼行氏急持剪刀自刺其喉以死

伍一鳴妻劉氏邵陽人一鳴爲獻賊所執氏遂投崖死同時楊烈妻姜氏娶未期月爲兵所掠欲污之氏嚴拒

因以刀加頸氏卽奪刀自殺兵磔其屍劉文標妻歐陽氏夫婦幼子俱錮一室中氏誼卒曰家饒肥馬金幣肯縱夫歸可得卒然之氏度夫行得脫嚼指奮臂拔卒佩刀自刎年纔十九卒亦感其烈爲具殮且縱一老婦抱其幼子以歸蔣惟芬妻呂氏執至水東壩夫婦相持赴河諸生周世顯妻王氏投崖死

柯大林妻楊氏新化人夫婦被掠渡江氏曰夫爲我撫兒我爲夫死節投水死同時諸生楊燦文妻李氏見夫爲潰兵所執遂自奪以手扼喉而死郭在中妻唐氏遇賊引頸受刃死楊氏曹氏聶氏姚氏楊夫張翼宿曹夫安文翼聶夫張欽翼姚夫張遴相皆諸生潰兵追迫皆

潔身不辱赴水死

管聲先妻張氏武岡人被掠不辱擁行至水南橋從馬上躍入河中死同時王鈞臣妻袁氏先將綳襍兒投之江中至潭水深處與二女躍入以死劉鉞妻鄭氏妾何氏竝投崖張氏王氏張夫廩生王之璠生女適李姓被追迫至威溪張手拉其女投湍浪中越數日兩屍浮於沙上朱企鱗妻陳氏不辱自刎貢生劉用戡妻王氏不辱投水鄧文祖妻何氏蕭漢友妻夏氏何避亂懷利刃自隨寓洪田聞兵勢已逼遂自刎夏亦於是日赴水諸生劉承健妻楊氏至清水塘跳入池中其女黌大甫九歲亦隨跳池中二卒射殺之喬濟望妻段氏被執於羅

圍塘以剪刺喉而死

蕭之芬妻伍氏新寧人潰兵至避石灘山被獲義不受辱遂遇害生男甫半齡環頸吮血逾日收殮面如生同時蔣爾誠妻羅氏潰兵斬門而入羅從後門走投水死
以上舊通志


皇清王霞舉妻陳氏邵陽人年十八歸王值吳逆寇警徙避他鄉霞舉病劇誓同死霞舉曰汝幸有身為似續計可耳且姑在何為遠死夫卒家益貧子復不育撫姪承祀有以年少勸改適者遂剪髮誓心一女亦早寡母子雙節康熙四十三年 旌
諸生車萬藻妻馬氏邵陽人年二十五而寡遺孤生

五歲時吳寇蹂躪氏嘗藏利刃於懷妯娌詢之荅曰脫有不測為潔身計耳閨門嚴肅雖子姪罕有覲面者康熙四十三年 旌

吳李芳妻王氏邵陽人性至孝李芳遠客奉姑避兵山中備嘗艱苦姑病嚮衣以資藥餌及歿斂葬訖長慟而絕

諸生張鯨妻賀氏邵陽人鯨卒氏年二十五無子有一女貧無以自存節操彌堅

王遴文女邵陽人幼許字諸生簡坤坤以攻苦嬰疾未娶而卒女聞訃哀號誓不更適父母欲嫁之鬱悒邁病尋卒
以上郡邑志



劉某妻粟氏武岡人年二十六而寡奉姑撫孤食貧
矢節孝慈兼盡康熙四十九年 旌

陳允建妻蔡氏邵陽人年二十六允建客他鄉訃至
欲以身殉姑諭以撫孤乃止孤子昌祚既長督課之
得為邑諸生女適簡伯鼎亦早寡矢志堅守有母風

康熙五十三年 旌

黃桂秦妻唐氏 婦鄧氏邵陽人年十八適桂秦桂
秦歿後三月舉一子躬織紉以資朝夕子又蚤世婦
鄧氏能繼姑志兩孀皓首一節聞者悲之康熙五十

四年 旌

諸生歐陽輝妻譚氏邵陽人年二十七而寡事翁姑

孝思純篤子三教以詩書偶游惰不率且哭且誨子
遂互相飭戒以勤學慰母心藩淳貢太學灝邑諸生
灝婦亦早寡兩世孀居熒熒相守康熙五十七年

旌

諸生周開祚妻柯氏新化人年二十六而寡奉姑教
子以苦節終雍正四年 旌

李子芳妻劉氏新化人年十七歸李生子三子芳病
劇以父老子幼臨終睠戀氏涕泣曰必不負君子芳
卒竭力孝養翁以壽終葬祭盡禮教育三子竝得成
立孀居三十五年始終一節雍正四年 旌
諸生袁章妻彭氏新化人無子為夫置妾妾子未晬

而章卒事姑逾孝謹姑疾躬奉湯藥經年廢寢撫妾
子如已出雍正五年 旌

劉斐妻彭氏邵陽人年二十五孀居勵操終身家貧
菽水養姑自傷不能供甘旨至老未嘗食肉雍正七
年 旌

諸生王元澤妻車氏邵陽人年二十八而寡姑老病
躬奉湯藥經歲彌謹孀居嚴肅雍正七年 旌

孫順甫妻劉氏邵陽人年十六歸順甫五月而寡家
貧無子姑及母諷使改適以死自誓苦節五十八年
雍正九年 旌

諸生羅與妻高氏邵陽人年少矢節孝慈備至雍正

九年 旌

諸生袁如松妻周氏新化人年二十四守節事姑盡
孝遺孤三課督如嚴父皆爲邑諸生雍正九年 旌

邱崇岳妻駱氏武岡人年少夫故事姑能孝養子升
歲貢生嵩邑諸生雍正九年 旌

劉應蘭妻雷氏武岡人年二十四而寡奉養翁姑以
女工供甘旨蔬食鶉衣備嘗荼苦雍正九年 旌

岳州府

漢胡寧妻趙氏巴陵人寧早世氏訓孤子以義方後寢
疾子灝拜濟陰守會滎陽寇亂例不得辭王命親醫藥
趙氏力疾起促灝之官疾亦旋愈

五代林氏華容人居縣北市母疾藥弗愈禱於天割股肉爲粥以啖母疾遂瘥同時有楊氏女者效之有司竝上其事詔旌焉有二孝坊 以上舊通志

宋韓氏女 **宋史列女傳**字希孟巴陵人或曰丞相琦之裔少明慧知讀書開慶元年大元兵至岳陽女年十有八爲卒所掠將挾以獻其主將女知必不免竟赴水死越三日得其尸於練裙帶有詩曰我質本瑚璉宗廟供蘋蘩一朝嬰禍難失身戎馬間寧當血刃死不作衽席完漢上有王猛江南無謝安長號赴洪流激烈摧心肝徐君寶妻 **楚寶**岳州人逸其姓同韓希孟爲元兵所掠至杭州主者數欲犯之因告曰俟妾祭謝先夫然後爲

君婦未遲也主者喜諾乃焚香再拜默祝南向飲泣投池中死

吳樵妻李氏平江人年甫十四家被火災兄嫂皆避去氏獨侍母居火亦尋止後以樵貴封安人 舊通志

明黎受三妻藍氏 **明一統志**巴陵人無子依弟榮孀居五十年 **洪武中旌**

甘氏女華容人名元秀父邦佐許字里人魏文昌 **洪武**間文昌父得罪應誅詣闕上疏願以身代遂伏法初文昌繫獄父欲改嫁其女女赴井以救免比文昌囚問至女沐浴具衣冠自縊以殉時年十五 舊通志

吳伏顯妻凌氏 **明一統志**平江人永樂間以節旌

方志通妻易氏明一統志巴陵人年二十而寡力貧養
姑姑疾篤易氏籲天求以身代竟瘞奉養逾謹孀居四
十餘年成化中旌

陳學明妻張氏明一統志巴陵人年二十而寡無子或
勸其改節氏斷義不可乃以夫兄之子為後辛勤撫育
孀居五十餘年成化中旌

梅紀妻方氏明一統志臨湘人年二十三而寡矢志不
渝成化中旌

余勝先妻黃氏明一統志臨湘人年二十二而寡撫孤
矢志終始不渝成化中旌

毛瑤妻黎氏明一統志華容人適毛甫二載夫卒守志

勤機杼以養姑教子向學矩範嶄然成化中旌

李信妻徐氏明一統志岳州衛人年十七適信生一子

英甫三歲信調征靖州歿於戍所氏年二十四清苦自
勵孝養其姑姑卒葬祭不違禮弘治中旌

陳旭妻余氏平江人守節事舅姑以孝稱弘治初旌

柳大潛妻楊氏巴陵人年二十六守節舅姑強之嫁誓
死赴水而止子三歲教之成學以上舊通志

謝紀妻李氏明一統志巴陵人性顓樸年二十四孀居
日夜號慟不輟屢絕復蘓遺腹生子梅鞠育成立皓首
一節成化間旌

王昇妻周氏明一統志岳州衛人年十八生一女昇任

千戶歿於兵周氏以節終弘治中旌

朱宣妻陳氏明一統志岳州衛人宣任指揮歿於陣氏

年二十二守節四十餘年弘治中旌

方成德妻陳氏巴陵人年二十三守節無子母欲奪而

嫁之氏誓死七日不食母乃止年五十五卒

文希道妻蕭氏巴陵人年二十二守節嘉靖中知府陸

瑯給粟帛獎之以上舊通志

沈玘妻劉氏明一統志臨湘人年二十一守節撫子植

稍長便遣就學學成舉於鄉嘉靖三十六年旌

余存爵妻黃氏平江人年二十生子甫三月夫故守節

教子養姑嘉靖間知縣任寅欲上其事氏懇辭之鄉人

尤加敬焉按余存爵舊通志作李爵

劉如魯妻毛氏華容人如魯大夏之孫卒時毛年二十

六子世享纔二歲守節垂五十載綜理家政咸有規法

嘉靖間御史陳豪獎之

伍玉瓚妻戴氏平江人年二十二守節撫子大鵬躬織

紡以養舅姑嘉靖十六年都御史顧璘表其門

秦允瑞妻傅氏平江人嫁未期而寡撫育腹子事舅姑

以孝著以上舊通志

王萬爵妻陳氏明一統志平江人年二十而寡無子孀

居四十餘年嘉靖間事聞詔旌之

諸生唐應治妻顏氏巴陵人應治早卒氏年二十九七

日不食口鼻流血萬曆三十九年題旌以子世柱官戶部封太宜人

唐一俊妻胡氏巴陵人俊早卒氏年十七剪髮自誓事尊嫜孝謹院司表異之

方隆母沈氏巴陵人少寡子隆年九歲舅姑欲令他適氏毀容誓志教子學成領鄉薦詔建坊旌表

陳鈞妻劉氏華容人年二十七守節辟蠶養姑孀居五十餘年

陳燦妻李氏華容人年十九守節無子姑亦早寡相守至饑餓不少變垂三十年學使者吳文華贊云姑兮貞婦兮烈清燈吊影淚成血

陳鼎妻石氏華容人年二十二守節撫三歲子孤苦伶仃冰霜自勵年六十餘

嚴循閑妻羅氏華容人貌寢陋年十八歸嚴期而生一女遂不見答循閑病且殆氏抱其女屬姑曰願姑視此女如女子勿但以爲女孫也姑怪之循閑旣卒哭盡哀是夜漏盡溢於棺側

楊葦妻易氏臨湘人葦早卒氏年二十餘苦志堅守教子成立萬曆中知縣張明孺請於大吏表其門

鄧于甸妻李氏華容人年二十夫卒李哀毀枕齒而死楊紹鳴妻許氏 妾鄧氏臨湘人許年二十七夫卒絕水漿十日屢自經母救始蘓許無子鄧生子一位纔兩

月同心苦節奉八旬舅姑典衣具膳先後殯葬成禮許
年八十六鄧七十有五天啟三年御史舒榮都請旨旌
門一位官湘鄉訓導孫柱朝成進士

張希美母劉氏華容人夫蚤卒氏茹荼守節天啟甲子
學臣徐人龍給匾獎之

張存愈妻毛氏華容人守節教子希奎學臣登甲科懷
宗時建坊旌表

姜振德妻劉氏巴陵人姑與夫俱被獻賊戮氏自縊
諸生許某妻康氏巴陵人夫婦俱執於獻賊氏給賊曰
釋夫願從汝及夫去氏溺水死司理戴吉人表其門
楊一鵬妾陳氏臨湘人年十五一鵬納之早寡撫一子

為賊掠去苦節六十餘年壽九十

張天經妻吳氏平江人年二十三守節葬夫為二壙一
以自待姑強其適人泣誓乃止卒得同穴 以上舊通志

王氏 鄧氏平江人王為彭穩梅妻鄧則其冢婦也明
末遇流寇鄧先赴程家井王投碧巖下死 縣志

皇清鄭廸啟妻楊氏臨湘人早寡悉脫簪珥延師課子後
其子方叔以明經任臨武學博楊年八十餘卒 舊通志

李宜祿妻陳氏平江人青年撫孤白首完操康熙三
十六年 旌

陳之遇妻劉氏臨湘人年十九而寡氏遺腹生子道
密撫教為諸生有交行康熙四十八年 旌

王師文妻嚴氏華容人年二十夫歿斷指截髮以示
靡他苦節三十五年

閔士元妻白氏華容人年十八歸士元明年生子友
善士元卒氏曰第無葬吾夫俟兒長吾將殉焉友善
長卜葬其父柩甫就舉氏暴卒

程自洞妻董氏 婦張氏華容人氏年二十夫故撫
孤文音成立爲娶婦張氏文音復早世張截髮自誓
姑婦雙節

王師鐸妻嚴氏華容人夫故子甫一齡撫之成長教
以父書雖餽粥不給矢節彌堅

徐玉子妻萬氏臨湘人年十九夫故家貧守節

吳儀周妻黃氏臨湘人年二十夫故無子食貧勵節
歷三十餘年 以上郡邑志

嚴一申妻張氏華容人守節孝養甘旨無闕康熙五
十五年 旌

趙萬卷妻唐氏巴陵人夫天歿欲以身殉姑何氏守
視甚密得免姑病足坐卧扶侍彌久不倦無子撫姪
再詩主夫後康熙六十一年 旌

魯文江妻潘氏平江人年二十五夫故氏斷指矢節
更歷顛沛不易所守雍正四年 旌

凌之鸚妻李氏 妾鍾氏平江人夫歿李年二十五
與鍾同心守節善事舅姑課子力學雍正四年 旌

張禮行妻彭氏平江人年二十五而寡葬夫親負土
爲冢撫子成立雍正五年 旌

王正愷妻蔡氏華容人蚤寡苦節養姑教子婦道母
道兼盡雍正五年 旌

童傳愈妻鍾氏平江人氏年二十二夫卒矢志不貳
事姑以孝聞遺孤先澤僅數月撫以成名

鍾宗舜妻陳氏平江人氏年二十七夫卒無子茹苦
守志孝事舅姑庭無間言年逾五十卒

魯行道妻童氏平江人氏年二十四夫卒無子或諷
其改適誓以死殉卒全其志

以上俱經舉
報候 題

常德府

五代馬希萼妻苑氏希萼楚王殷之子與弟希廣爭立
苑諫曰兄弟相攻禍將至矣希萼不聽赴井而死 舊通

志

周行逢妻嚴氏五代史楚世家行逢果於殺戮夫人嚴
氏諫曰人情有善惡安得一概殺之乎行逢怒曰此外
事婦人何知嚴氏不悅給曰冢田佃戶以公貴頗不力
農請往視之至則營居以老歲時衣青裙押佃戶送租
入城行逢往就見之勞曰吾貴矣夫人何自苦邪嚴氏
曰公思作戶長時乎民租後時常苦鞭朴今貴矣宜先
期以率衆安得遂忘權畝間乎行逢彊邀之以羣妾擁
升肩輿嚴氏卒無留意因曰公用法太嚴而失人心所

以不欲留者一旦禍起田野間易為逃死耳行逢為少損

元林德成妻張氏明一統志武陵人年二十德成卒斷指自誓守節宣德中旌

明史源濟妻孫氏明一統志龍陽人年二十五而寡誓死守節宣德中旌

伍景妻梅氏明一統志龍陽人年十八適景明年景卒又明年舅姑俱逝父憐其少且貧欲改嫁之氏不從紡績自給節行無虧成化間旌門

袁奎妻史氏明一統志龍陽人年二十三守節貧甚紡績奉姑撫幼成立成化中旌

會義妻王氏明一統志沅江人義卒氏年十九遺腹三月生子撫孤厲節養姑以孝聞隆慶二年有司奏聞旌表

劉澧妻燕氏桃源人年二十二矢節壽至百三歲當事造廬存問

徐瑄妻黃氏常德衛人成化初瑄備禦潯州陣歿氏欲從死親族勸止之撫孤壘成人襲世職弘治初亦歿於潯復撫幼孫輔人稱完節

黎璟妻劉氏桃源人年二十六而寡姑強改適誓死守節有司旌獎

賈賢妻王氏沅江人嫁八月而賢溺死氏年十八父母

欲奪志王誓死守節紡績奉姑以孝聞

陳大韶妻萬氏大韶武陵人御史策之子韶卒氏年二十七欲自盡姑勸止之會逆瑾誣策坐罰米若干氏脫簪珥易米輸之乃免課子錄學成領鄉薦嘉靖中當道題請旌表

龍凌霄妻劉氏武陵人適凌霄暮年生子甫三月凌霄疾篤嘆曰吾死幼子誰託氏泣曰君脫不幸吾忍負君凌霄卒氏矢節孝養舅姑撫子爲諸生力學事聞旌表楊應期妻王氏武陵人年十九而寡遺腹生子曰孝誓死守節舅得末疾支離床第氏浣滌穢惡孝養備至曰孝爲諸生孫伯高爲孝廉

諸生熊富秋妻廉氏龍陽人年二十富秋卒廉甘貧矢志奉姑餘年撫子成立以承夫志鄉黨以節孝稱之隆慶間有司奏聞旌表

劉斗妻黎氏桃源人斗早世氏守節四十年事聞旌表曰孝節

吳經妻邵氏常德衛人年十九而寡遺孤二歲家貧鬻地以葬守節養姑土豪侵凌逼嫁氏毀容終節事聞旌表

劉達妻陳氏常德衛人年二十而寡矢節撫孤孤復天撫孫補諸生壽九十見曾孫崇信舉孝廉事聞詔旌曰節壽

樊斗妻段氏沅江人年二十七撫遺腹子東曉補諸生未幾子婦相繼歿段撫幼孫益勵苦節

舒泰妻蕭氏沅江人年二十夫赴省試卒氏貧苦勵操四十餘年以孝節聞

聶氏 周氏武陵人聶江寧主簿李冕妾年二十而寡子徽七歲悉心訓育娶婦周氏生孫采甫五歲徽卒姑婦食貧撫采補邑諸生當事匾其門曰雙節

陶國清妻談氏武陵人年二十而寡生子得仁方二歲遺腹又生子孝兒舅姑相繼歿氏嚮孝兒襄事以績紡經營久之得償其直贖孝兒以歸苦節歷五十餘年詔旌其門

張懋勛妻蔡氏龍陽人年二十二而寡遺腹生女矢志不再適撫女將笄以諸生顧汝學為贅婿尋與女俱天依外孫終老事聞詔旌之

高可行妻朱氏武陵人年二十四而寡遺腹生子誓不他適舅姑相繼下世家益貧終無二志事聞旌表

伍鎮東妻劉氏龍陽人鎮東為諸生早世氏年二十四遺孤甫一歲有求娶者氏引刀欲自殺鄰婦救免茹荼鞠子以完節終

諸生張鵠妻黃氏武陵人年二十五而寡食貧撫孤四十餘年事聞旌表

史策妻韓氏武陵人年二十而寡遺腹子載章撫教成

立年八十餘萬曆間建坊旌表

柳東仲妻彭氏武陵人東仲負美才早世彭年二十止生一子誓死守節事舅姑以孝聞

黃鶴鳴妻喬氏武陵人年十九孀居撫遺腹子一寧成立事聞旌表

劉承恩妻朱氏桃源人年二十三而寡撫遺孤祥事姑盡孝姑卒祥天撫孫夢麟四十餘年事聞旌獎

張還妻吳氏桃源人年二十守節孤子萬玉亦早世撫孫羽成立御史按部聞之給以粟帛

鮑之管妻李氏武陵人年二十四寡居撫子嘉猷成立歷五十餘年人無間言

史廷佐妾鍾氏龍陽人年二十孀居與嫡楊氏教長孫與祿成名萬曆辛亥與祿疏上其事奉旨特旌

諸生彭序祖母雙氏龍陽人年二十一守志貧不改操孫序列其事上之當事奏請旌表

史贊舜妻唐氏龍陽人年二十一發居規範最嚴雖兵火播遷造次顛沛不妄與男子通一語年踰六十不變

諸生李雲登妻諸氏 李嗣先妻楊氏武陵人諸年二十四而孀節操凜然撫教長子嗣先次子嗣宗文譽並著遺腹子嗣璘以選貢入太學嗣先妻楊氏復蚤孀撫三孤長子渾仕至廣信同知楊氏壽入十二姑婦雙節賀氏武陵人幼許字羅生羅生殤誓不適人郡守旌之

曰日未覩夫面而矢志不回足未履夫門而迎姑就養
在賀爲貞女在羅爲孝婦

王萬齡妻楊氏武陵人年二十夫故止一女適石某女
復天撫其外孫水霜斃獨歷五十四年

賴光恩妻羅氏武陵人年二十五而寡撫孤婚娶復天
氏更撫孤孫成立備歷艱難霜節彌固奉詔旌表

諸生陳昌期妻戴氏常德衛人年二十夫卒欲以身殉
舅姑諭以撫孤乃止克盡孝道教子有立事聞旌表

陳氏武陵人孝廉陳其道之庶母其道甫暮月失恃氏
撫視乳哺愛憐備至六歲而孤家益貧氏辛勤課讀每

夜分未已其道舉於鄉氏遽背棄其道衰晚憶氏未嘗
不嗚咽流涕

諸生鄒張魯妻郭氏桃源人夫卒氏哭泣三月以死事
聞旌表

龍之濤妻謝氏桃源人年二十二守節撫兩孤子間關
亂離教育成立晚歲得見孫曾閨範肅然

舉人胡拱辰母黎氏 妻彭氏桃源人黎年二十四而
寡拱辰生甫六月撫教成立舉孝廉尋卒彭復子居相
依撫三孤俱有才名當道獎之

歲貢生魯勇母胡氏桃源人男生九月而孤氏撫教之
勤於女紅以佐膏火後男貢太學當事旌獎

諸生李在川妻胡氏桃源人在川及其兩弟俱早世兩

婦他適胡矢節堅完更爲叔立主後年七十五終詔旌其門

諸生楊歸儒妻劉氏武陵人年十八夫病寢篤歔歔太息氏泣曰吾誓以死守孤君勿慮也孀居六十餘年年八十九乃終

諸生鮑啟登妻楊氏武陵人年二十守節獻賊亂被執長子幼孫俱罵賊死氏求死賊憐之遂去氏取書枕子首曰吾兒烈士無負聖賢良久呼天謂曰守孤以繼夫後吾事也今吾兒與孫逝矣吾當從夫地下厝火茅屋端坐就焚三尸灰燼

敖氏 唐氏武陵人敖適於唐孀居苦守止一女以妻龍之楚之楚死於兵唐氏與孀母相依爲命母子完節闔郡欽之

諸生趙昌妻熊氏武陵人年二十爲亂賊所執欲脅汚之氏大罵不從截兩臂罵益厲賊剖其腹而死
諸生潘澍妻史氏武陵人年二十遇賊赴水賊捉其髮出之水中氏大罵賊以刀截其口氏卽以口血噴賊面賊遂磔之

陳氏 賀氏武陵人俱吳崇教之婦爲獻賊所獲詬罵不從賊殺陳以脅賀賀罵愈厲賊復殺其子終不屈割其腹將盡罵猶未絕

諸生胡養冲妻燕氏武陵人獻賊黨殺其夫執氏欲汚

之燕與女善貞俱不屈相抱赴火自焚

李開元妻向氏武陵人年二十二守節子允甫二歲撫以成立道府獎之

何氏常德衛人何其禮之女適熊生一子陷兵中氏謂夫曰勿以我相誤我死君父子勉圖歸計遂挈子至江濱與訣別赴水死

進士楊鶚妻鄭氏常德衛人獻賊至氏語二妾曰汝年少艷色必遭污何以見而至於地下立視兩妾自盡遂毀其面觸城垣而死

諸生鄭人玫妻鍾氏武陵人年十九爲賊所執囚繫慘苦必不從自齧斷其肉寄夫以明不污賊磔之

陳經邦妻明氏桃源人避亂以利刃自隨猝遇賊欲污之明遂自刎

談徵言妻李氏 談繼周妻邵氏武陵人徵言卒李年二十七遺孤繼周五歲繼程二歲家素貧乏李績紡自給課二孤力學歷廿餘年繼周登賢書繼程亦列黌序亡何繼周之任郎西卒於塗其妻邵氏年二十九聞訃欲從死李哭曰汝從夫死得矣乃欲以藐孤累老寡婦耶邵乃從命姑婦苦節終身

以上舊通志

皇清唐諧妻譚氏武陵人年十九而寡撫三歲孤祚培膺康熙壬子選拔孫待徵待聘俱以明經任廣文苦節五十餘年壽七十二卒康熙三十四年 旌

蕭宗賡妻栗氏少寡苦節終身康熙四十三年旌
楊山櫟妻陳氏常德衛人櫟卒陳年十九遺孤農基
甫數月賊陷常德舉家離散陳偕稚子從辰谿艱苦
備嘗後農基早夭氏撫兩孫紹綏成立康熙戊子紹
登賢書累官至參政人以爲賢節之報康熙四十七
年旌

張玉璿妻靳氏武陵人二十二爲孀婦事姑以孝聞
課子有方吳逆之變避亂陽山賊追之急赴激湍中
得岸旁樹枝以免復逃深山失路遇虎虎躍去其後
母子復相保聚同行避難者咸歎爲苦節所感康熙
四十八年旌

劉侃遠妻王氏侃遠爲龍陽諸生早卒氏年二十四
家貧日不再食身無完衣苦節五十餘年有一子五
孫以壽終

劉廷妻曾氏龍陽人年十九而寡無子女田產欲以
身殉念姑在不忍也孝養備至及姑卒曾亦死

彭國儀妻鄧氏龍陽人年十七歸國儀踰年而國儀
病語氏曰我死汝宜去氏曰夫死我亦死耳國儀曰
汝卽死吾不及見何自苦氏痛夫之言是夕遂自經

彭踰月而卒

以上郡邑志

諸生劉體寅繼妻熊氏武陵人體寅故氏年二十四
矢志守節撫教前妻王氏子應箕其子應采應奎俱

為邑諸生康熙五十三年 旌

歲貢生歐陽淑母石氏武陵人年二十一而寡姑李氏病劇割股以進姑覺大驚病遂愈康熙五十八年

旌

徐昌盛妻潘氏武陵人年二十九夫卒無子誓以身

殉舅姑日夜守視潘遂請立為夫後者撫之吳逆之

變潘度舅姑老病不能走避不忍捨舅姑求活即懷

刃自隨賊至操刃而前曰免我舅姑吾請死賊嘆為

孝婦去之康熙五十八年 旌

陳之鸞妻譚氏武陵人年十八而寡誓率志舅姑以

家貧恐不克終婉諭之氏泣曰婦所以不死者徒以

舅姑在今言若此何以生為舅姑乃不忍復言撫孤

大彥成立雍正三年 旌

楊系妻常氏武陵人年二十八而寡孝事孀姑治家

嚴肅教子仔曾為邑名諸生雍正三年 旌

辰州府

〔明〕王泰妻張氏〔明〕一統志泰為辰州衛指揮舍人卒氏

年十九生子英始逾歲氏剪髮誓志事舅姑彌謹詔旌

其門後子英以軍功累官至都指揮使張封太夫人

張弘道妻陳氏〔明〕一統志沅州人無子堅志守節洪武

中旌

王之文妻鮑氏名賽賽辰州衛人父之良斫畚賽與俱

遇虎攫之良去賽舉奮刀追及虎虎傷遂與相持久之
刀折亦死於虎 見舊通志按府志鮑氏未載夫名舊通志或另有據今仍之至以為晉人則晉時無辰州衛名

馬祥妻陳氏 明一統志 沅州人祥卒氏年十九子在襁
褓有武臣以媒通欲娶之氏痛哭諾媒誓死無他志撫
子成立嘉靖中旌


李太麒妻張氏沅陵人張新寡而其姊之夫文思源初
喪婦其父母將以妹改適之氏曰世未有以姊夫為夫
者也遂縊 按舊志皆作晉人

賀一策妻陸氏淑浦諸生邦堯女許字一策未嫁而一
策殤女在號慟誓死守志及歸毀容斷髮遂以處女終
有司旌之 按府志陸氏幼許賀一策舊通志賀作賈

周成聘妻張氏黔陽人許字成聘未嫁成聘卒氏聞夜
自縊因與成聘同穴葬焉 以上舊通志

向氏田氏兩姓四節俱黔陽人向晚女年十六未字向
焦女為張明儒妻田氏一為張廷表妻一為張廷相妻
嘉靖中苗寇掠村落同避匿甕泡灘巖苗寇漸逼遂俱
投水死越四日家人獲其屍時盛暑顏色皆如生撫臣
建四節祠祀焉 縣志

向春妻張氏黔陽人春卒後七日縊於柩旁氏時年十
七適春甫數月 見舊通志按舊志作元人
王允明妻蔣氏辰谿人年十八值土賊亂搶掠入門氏



執刀連殺三賊遂自刎見舊通志按舊志作元人

諸生潘耀卿妻賈氏明一統志沅陵人耀卿挈氏省父棠於南京至湖口耀卿卒氏卽赴水女奴持之既見舅姑入室自縊以救免自是減食凡四十餘日絕食者累日竟自刎遺詩云拋棄殘生思不禁可憐死別倍傷心雙魂杳杳今何在化作啼鶻逐故林應天尹以聞詔旌之

張文舉妻陳氏麻陽人年少矢節至年六十終有司表其間舊通志

貞女丁美音潯浦人丁正明女幼受夏學程聘年十八將嫁而學程死美音哭之慟未幾邑人有求婚者父母

許之美音執不可父母曰未嫁守節非禮也何自苦如此美音齧指滴血籲天自矢當道交獎之資以銀幣資約百金美音以所得構室獨居鬻田自贍勤事翁姑孝養父母鄉人名其田爲貞女田明史稿

武玉瑾妻賀氏沅陵人玉瑾卒氏年十八兄公受金欲令氏改嫁氏自縊有守者不得死訟於官得以節終按府志賀氏武玉瑾妻舊志作王珪

李弘妻陳氏沅陵人許字弘未嫁弘訃至陳遂餓死梁嶽妻曲氏梁凌霄妻吳氏沅陵人嶽卒曲年十八子凌雲三歲凌霄未暮曲苦守凌霄娶吳氏而天遺孤甫數月吳與姑同心堅操曲年六十九吳年七十餘卒

時稱一門雙節

邵銳妻雷氏沅陵人年二十歸銳生子文臣銳卒氏哀過幾殞其父母勸之乃曰吾當待藐孤成立異日或可見夫子於地下文臣領萬曆戊子鄉薦雷年八十向達妻文氏溆浦人達卒氏年二十有富人媒娶氏割鼻自毀完節至年八十終有司獎之 以上舊通志

憲副李棟妾張氏 三楚文獻錄 瀘溪人年二十餘李卒無子毀容守節誓死不嫁年逾七十御史疏聞旌表


皇清楊愈森妻向氏黔陽人年二十一嫁愈森生一子甫一歲時黔寇進據長州夫妻逃山谷中氏被執賊欲污之不從賊遂焚愈森氏悲啼抱子投烈焰中夫婦

同時死賊感其烈合葬氏夫去 按舊通志誤編入元

胡嗣先妻田氏沅陵人黔寇肆掠將逼沅陵氏振衣投水中其父以篙援之氏曰生而辱不如死而潔遂自沉也

龍顏近妻陳氏辰州人夫婦為黔寇所掠寇欲污之遂引所佩剪刀自刺死寇義之厝火焚屍葬於明溪竝釋顏近 以上舊通志

烈女吳氏沅陵人許字顏三台父母俱歿其祖母送女至顏氏未婚而三台被掠舅姑將改室其少子不從康熙二十九年女年十九舅姑強之女哀號自投溪中死



黃璧妻鄭氏黔陽人流寇餘孽肆掠沅辰間黃闔家
遇害氏抱乳嬰匿山中得脫歸依母家時年十九茹
苦守節教子振新爲諸生年九十八終

唐有望妻李氏黔陽人爲流寇所執義不受汙赴水
死十餘日顏色如生有望傷之終身不再娶

王士龍妻舒氏沅陵人夫卒舒斂畢自投江死

米華鵬妻姚氏沅陵人華鵬病革謂曰我死汝何從
答曰從君及華鵬卒姚遂縊

李長青妻楊氏瀘溪人少寡爲人逼娶父母誑於勢
勸之遂投水死

熊佐文妻萬氏沅陵人鄰某伺佐文出強污之不從
某旣逸矣氏終以爲恥自縊死

賀國正妻劉氏沅州人年十九而寡無子孝事舅姑
及卒親荷畚壘土以葬聞者哀之年八十二卒

諸生胡世仁母張氏沅州人少寡矢節不渝年至七
十六卒

諸生向天諫妻李氏黔陽人天諫早卒氏年二十撫
教其子孫皆成立年七十五卒

危如鵬妻楊氏黔陽人年二十二孀居遺孤懋甫數
月誓不再嫁後懋食餼於庠爲名諸生氏勵苦節六
十五年

貞女廖氏黔陽廖必瑞女許字向安未嫁安客死廖

子居終身年七十八卒

以上郡邑志

廖縉妻尹氏沅陵人年二十三而寡孝事舅姑霜操

始終康熙四十七年 旌

李門五節婦瀘溪歲貢生李象珍生子五人長枝奐

庠生娶張氏次枝英娶張氏三枝衍庠生娶龔氏四

枝永庠生娶楊氏五枝晟娶劉氏枝奐兄弟俱早世

張等妯娌五人同心守節其子孫多賢而有文康熙

五十六年 旌

龔錫球妻麋氏瀘溪人年二十四而寡甘貧勵節教

子成立雍正三年 旌

石祚煥妻張氏 石祚煜妻文氏瀘溪人張年二十

文年十八姒娣同失所天砥節撫孤闈範肅然雍正

四年 旌

貞女余氏辰溪諸生余嵩重女許聘沅陵舒慈未嫁

慈卒氏往撫柩慟哭誓死以殉舅姑為立嗣乃終身

稱未亡人雍正四年 旌

滿世聲妻張氏麻陽人年二十九而寡舅姑病篤必

焚香默禱願以身代既卒哀禮兼盡督課三子並列

膠庠雍正四年 旌

徐雲清妻陶氏沅州人守節事舅姑以孝謹聞雍正

五年 旌

鄧鍾喬妻陳氏沅州人鍾喬仕經歷卒氏冰檠自持

孝慈兼盡雍正六年 旌

潘浚妻李氏浚為黔陽諸生有文譽早卒氏年二十七矢志靡他教子士極成立雍正六年 旌

郝文明妻劉氏沅州人年二十二而寡苦節終身雍正七年 旌

永順府

皇清李某妻呂氏保靖人歸李生一子年十九而寡子尋

卒孀居勵節四十五年 郡志

直隸澧州

元賈氏澧州人善屬文年二十歸於謝九年而寡紡績自給教子拱辰舉明經垂老閨門肅然朝旨旌焉

于氏慈利人早寡撫孤成立大德間事聞旌其門曰節孝 以上舊通志

明王谷樹妻程氏明一統志澧州人谷樹寢疾刲臂為粥以進且殆以家貧子幼命其改適氏剪髮誓無他終身足不踰閩洪武中旌

左志廣妻謝氏澧州人年二十守節撫遺腹子歲荒採菱蕨自活紡績養舅姑年八十卒事聞旌表

任璋妻高氏澧州人年二十六夫亡氏守節無子父母強之嫁輒欲自刎乃止都御史林大畧提學蔡潮表其門

任越妻周氏澧州人年二十四守節撫二歲孤至成立

都御史林大畧獎之

戴昂妻廖氏澧州人昂溺死氏撫四歲子始諷之嫁因截其髮都御史表其門

梁樞妻王氏澧州人刲股以療姑疾創甚遂死御史陳豪題其門曰孝婦

鄧守忠妻伍氏慈利人年十九守節撫子奉舅姑終其身

劉瑄妻韓氏慈利人年二十守節撫孤成立至年七十餘卒

劉秉仁妻丁氏慈利人嫁十月而寡年十七守節至年九十四終當省獎之

史錠妻孟氏 王聚妻孟氏慈利人女兄弟也俱早寡相與守節終身時目為雙璧云

李維徵妻趙氏安鄉人年二十守節撫三月子教之成立縣令額其堂曰碩節以上舊通志

宋世將妻琴氏永定衛人有世職世將未襲而歿氏年三十餘勵操冰霜撫孤子至長襲職年五十遭亂懼辱遂縊

楊顯德妻彭氏永定衛人避亂山谷為流寇搜獲殺其幼女鞭驅之不行請加刃死之以上郡志

皇清方士甲妻王氏澧州人年二十九而寡誓死守節教子有光食餼於庠雍正二年旌

楊期遠妻孫氏澧州人年二十而寡無子苦節三十
九年雍正七年旌

尹天壽妻魯氏澧州人壽卒魯年二十九苦節四十
一年

王人贈妻羅氏澧州人年二十孀居辟纒自給砥節
三十五年 以上郡邑志

直隸郴州


漢歐端遷妻蔡氏永興人端遷早卒氏清苦守節事舅
姑以孝稱舅姑歿哀戚盡禮未葬鄰豕失火氏繞棺長
號有反風之異人謂孝感焉今永興孀塚立祠祀之
舊通志

明朱守良妻鄧氏明一統志桂陽人弘治間賊邱子高
等陷桂陽執鄧欲辱之氏呼天罵賊遂遇害

何冲孚妻李氏明一統志興寧人嘉靖間猺賊迫之罵
賊見殺

曹文璋妻朱氏 曹悅妻黃氏明一統志郴州人朱為
通判芾之女年十八歸文璋生子悅甫三歲文璋卒朱
守節撫孤悅長為娶知縣黃安女未幾悅卒黃氏亦誓
不他適姑婦稱雙節云

諸生黃爵妻戴氏郴州人爵卒戴年二十一守志不貳
有求婚者引刀自刺其面苦節教子皆有文譽年八十
餘終



諸生高天霖妻谷氏郴州人年十八夫死嘗置利刃於床莫敢有奪其志者

王貴妻黃氏興寧人年十六矢節至年八十終

諸生譚文載妻謝氏永興人年十八而寡無子或勸之

他適氏泣曰豈可再為他人婦紡績奉姑兼以孝聞

黃泗妻曹氏永興人年十七守節終身

黃灝妻李氏宜章人李易之女灝卒投井中以殉

李禎繼妻洪氏永興人年十九而寡毀容截髮撫腹子

成立

彭萬忠妻楚氏桂東人夫歿誓不二志有貢士求為繼

室斷臂以謝苦節至老

舉人袁從諤妻陳氏郴州人從諤以甲申赴難死氏年

十九痛絕復甦矢志育孤扁戶蕭然至不能舉火歷三

十年勵操始終鄉人義之以上舊通志

顏景春妻田氏郴州人年二十一而寡守節事舅姑撫

孤子舅姑卒子亦夭終無二志

黃氏女宜章人成化間大羅山寇發女年十七父母挈

之避亂女曰是將持我安之乎脫不幸惟有死耳賊至

被執自嚼其舌瀝血罵賊賊殺之於年塘石上石迸裂

流泉至今石色猶赤土人立祠祀焉

蕭鳴鳳妻劉氏 蕭韶妻李氏郴州人鳴鳳蚤世氏矢

志撫孤孤韶既長娶李氏生二子韶卒李撫其子有成

姑婦雙節年皆八十餘

歲貢生袁子龍妻毛氏郴州人年二十七守志終身不
衣帛不歸寧年八十七終

李淳妻王氏郴州人正德辛未流寇突入其室欲污之
罵不從遂遇害

袁文萃妻蒙氏桂陽人正德間猶賊陳賓作亂清晨突
至其家氏猶在床賊將污之罵曰吾豈汝奴配遂見殺
竝其二歲嬰兒死焉

李正女宜章人幼許適鄧氏鄧氏子殤女泣曰吾有夫
未得見而終命也遂不嫁年至六十餘

歐陽晚香宜章人里中苦生者聘之而天晚香年十五
父母欲更許人齧指出血因以而言曰一女息可重婚
二氏乎遂堅白自矢通判山谷攝縣事獎之以詩曰嫁
衣不著繡閨深肯向茅廬獨閉門不是歲寒心似鐵幾
家簫鼓幾黃昏

朱瓏繼妻趙氏桂陽人瓏以祖英廕入監卒氏年少守
節撫其前妻子旻旻卒又撫其孫一通後年至七十餘
卒

諸生袁文璽繼妻蒙氏桂陽人年二十而寡撫前妻子
如已出常攜以歸寧父母欲其改適泣曰寧死肯捨袁
氏一塊肉耶父母知其不可奪蒙亦自是不復歸寧
朱永湯妻宋氏桂陽人年二十湯卒母命改嫁不從矢

節事姑姑嘗病目氏為舐之復明以上舊通志

皇清李繼周妻段氏興寧人年二十四孀居勵節撫孤歲

歉有司煮粥以賑氏恐饑不就康熙五十三年旌

諸生樊文化妻何氏興寧人年二十一夫故姑病侍

湯藥衣不解帶教子上士為縣學生康熙五十三年

旌

諸生樊文詩妻黃氏興寧人孀居年二十四勤女紅

自給值溪水汎漲村民皆走避氏以姑柩在堂不忍

去水亦不為害子元為諸生有文譽母教也康熙五

十三年旌

鄧熙志妻劉氏宜章人少寡誓死守節康熙五十五

年旌

周德深妻何氏桂陽人年二十一夫卒氏斂畢閉戶

自刎

李珊妻黎氏粵東人徙宜章珊採薪山中壓墜石以

死氏訝其夫久不還入山跡得之既斂畢語家人曰

吾夫貧苦無藉死非其命吾又無子而忍獨生乎遂

自刎鄉鄰悲悼為斂貲合葬

廖仲芳妻何氏安仁人嫁仲芳十日仲芳病篤語氏

曰汝改圖矣毋自誤氏曰婦人之義從一而終脫有

不諱當相從地下及仲芳卒氏斂畢遂投繯死時年

二十三

李泌福妻宋氏興寧人年二十一夫卒遂自經以殉
何明旭妻袁氏興寧人初適明旭見家貧親老盡出
奩資以供甘旨年二十夫卒撫遺腹子忠信補諸生
以壽終雍正六年 旌

蔣玉妻段氏興寧人年二十二而寡躬親紡績以養
舅姑撫孤成立雍正六年 旌

諸生周士僕妻楊氏 周燿妻曾氏郴州人楊年二
十而寡或勸其改適斷指毀容苦節垂三十年會亦
年少嫠惇感姑志堅竝稱完操雍正六年 旌

賀子羨妻李氏郴州人年少孀居家甚貧兄公勸其
改適氏泣曰吾面目不能復向他人也斷髮自誓姑

病劇刲股以療及卒斂葬皆盡力舅歿亦如之歲庚
子氏病篤戒家人以縞素斂雍正六年 旌

藍可行妻歐氏宜章人年二十而寡生子甫二齡氏
灌園自給有馴虎之異雍正八年 旌

藍性孝妻吳氏宜章人年二十九夫歿子女皆不育
氏惇獨守志雍正八年 旌

李遠珠妻鄭氏宜章人嫠居年二十五白首無玷雍
正八年 旌

朱良佐妻周氏桂陽人年二十三夫故事舅姑愈謹
撫孤子有用食餼於庠雍正八年 旌

陳雲石妻鄧氏桂陽人年二十一而寡遺孤甫五月

鄧養姑鞠子備極辛勤雍正八年 旌

歐陽永皓妻宋氏桂陽人年二十七夫故養姑課子

雍正八年 旌

何萬鍾妻李氏郴州人年二十二孀居孝養舅姑茹

荼課子雍正八年 旌

諸生鄧治冀妻張氏郴州人年十九而寡無子斷髮

毀容撫前妻子督課入縣學雍正八年 旌

陳學禮妻谷氏郴州人年二十一孀居奉姑鞠子以

節孝稱雍正九年 旌

陳守悠妻何氏桂陽人年二十五而寡食貧堅守四

十七年雍正九年 旌

何美科妻曹氏桂陽人美科卒氏年二十三孝事舅

姑撫子高穎高捷俱得成立高捷歿與其婦朱撫孤

孫亦矢志靡他邑中稱雙節雍正九年 旌

袁宗琦妻黃氏桂陽人年二十五而寡孝事舅姑鞠

育孤子勁節始終如一雍正八年 旌

陳士雲妻何氏桂陽人年二十四孀居奉姑課子人

稱完節雍正九年 旌

何勝岱妻胡氏桂陽人年二十一而寡長子遊邑庠

次子亦博學能文尋相繼早世復與曹宋兩婦鞠育

諸孫永霜共勵雍正九年 旌

胡皇錫妻歐陽氏桂陽人年二十四夫故投繯幾絕

家人救免事舅姑竭盡孝養苦節五十三年雍正九年旌

胡茂楚妻何氏桂陽人年二十五守節閱五十八年雍正九年旌

直隸靖州

明王晨女明一統志靖州衛指揮僉事女許嫁陶絃未婚而絃卒女聞之義不忍他適遂自經死因合葬於城北事聞表其墓閭

陳均保妻向氏明一統志靖州衛人年及笄歸陳未半載均保以疾卒向哀毀既殯後恐父母欲奪其志遂自經詔旌其門

蔣穎妻薛氏明一統志靖州衛人年二十二其夫武科舉人赴京溺水死氏聞計悲號竟自經天順間旌門

陳儁妻劉氏明一統志靖州人儁任指揮同知陣歿劉以節聞成化中詔旌之

王志妻方氏明一統志靖州人年二十五守節歷六十餘年隆慶六年有司奏聞旌表

史斌妻陶氏明一統志靖州衛人年二十一夫故守節被旌

黃流妻陳氏明一統志靖州人年二十一夫卒撫幼子以節受旌

袁氏女明一統志五開衛百戶袁傑女八歲聘於指揮

王載子言言甫七歲以父賊罪禁追遂卒哀守節至老
不二云

馬應乾妻劉氏靖州人應乾卒劉年二十苦志守節七
十餘年嘉靖間僉事提學竝獎表之

龍吟妻王氏會同人年二十撫半歲孤苦節終身

張儒妻楊氏靖州人儒卒守志嘉靖間知州王廷佐表

其門

梁文妻李氏靖州人文卒李年十八養姑撫子以節終
嘉靖間巡按獎之

王功妻陳氏靖州人年二十二而寡苦節自矢隆慶間
知府黃鎮表之

章燦妻鄧氏靖州人年二十守節知府黃鎮旌表其間

胡楠妻王氏靖州人年十八撫遺腹子以全節終

宋希周妻梁氏靖州人殉夫死萬曆間建坊旌表

馮仁妻劉氏靖州人嫁甫一年仁卒氏年十九無子守
節終身

李寬妻王氏靖州人寬卒氏甘貧守節撫一歲藐孤至
成立

王興妻宋氏靖州人年二十二守志撫孤七十餘年

史璽妻丁氏靖州人年二十撫孤稱完節

唐子爵妻龍氏會同人年十八夫故子甫三月撫育有
成年至七十萬曆間御史表之

唐文鰲妻羅氏會同人年二十三而寡存撫幼孤矢志不渝

陳經與妻馮氏 馮學海妻丁氏靖州人姑嫂為獻賊所掠度不免竝投江而死

唐朝選妻梁氏會同人生女月環母女避流寇於紅門塘被執俱投水死

梁日榮妻粟氏會同人獻賊執之於平村觸柱死

唐守朝妻栗氏會同人夫卒氏年二十撫孤守志孝養舅姑

梁玉鏡妻唐氏會同人年二十守志撫孤終身

龍景翔妻李氏會同人年二十二守節歷五十餘年卒

龍貴妻夏氏綏寧人年少苦節撫姪為夫後水霜行志終始不移

胡玉妻湯氏天柱人年十九矢節至六十餘年撫孤成

立以上舊通志

皇清貞女曾氏綏寧人少許字同縣蕭民未嫁而民卒全

貞以老順治十八年 旌 舊通志

趙聯會妻鄧氏靖州人歸趙趙已臥病侍藥三月及卒殮葬畢遂自經以殉雍正五年 旌

曾之祚妻唐氏通道人年二十八而寡事姑盡孝課子成立雍正八年 旌

附增

長沙府

張晉毓妻聶氏益陽縣人年十五適張二十七歲夫故矢志不二奉姑克盡孝養課子有方守節二十八年雍正十年 旌

生員彭弘憲妻夏氏攸縣人年十四歸彭二十八歲夫故躬自紡績上奉舅姑下撫孤子苦節三十三年雍正十年 旌

儒士劉茂資妻譚氏茶陵州人年十七歸劉二十七歲夫故紡績撫孤苦節四十五年雍正十年 旌

衡州府

生員譚繼誦妻胡氏長寧縣人年十六歸譚二十

歲夫故母氏諷之改適氏斷髮盟心誓不二志

姑克盡孝養守節三十五年雍正十年 旌

桂陽州

生員尹如錫妻傅氏桂陽州人年二十歸尹六年夫故誓不二適守節三十九年雍正十年 旌

岳州府

貞女聶大姑臨湘縣人幼為蒲圻張大傑所聘大傑早夭女甫十齡聞計悲泣矢志不字守貞歷四十年雍正十年 旌

常德府

翦如琰妻張氏桃源縣人年二十一而寡竭力操作

門戶不衰事姑及祖姑養生送死恩禮備至延師教

子有成守節四十七年雍正十年 旌

羅弘烈妻伍氏桃源縣人年十八歸羅二十而寡孝

事孀姑生養死葬哀禮兼盡延師訓子督課極嚴守

節歷六十年雍正十年 旌

辰州府

姜文煥妻張氏沅陵縣人年十六歸姜十九夫故孝

事翁姑一門雍穆鄰里奉為楷模守節五十六年雍

正十年 旌

劉虔妻朱氏辰谿縣人年十七歸劉十九夫故矢志

不二事翁姑撫孤子孝慈兼至守節三十九年 旌

十年 旌

柳州

黃良藩妻楊氏柳州人年十六歸黃二十一而寡苦

志撫孤事翁姑克盡孝養年七十六歲守節五十七

年雍正十年 旌

何香節妻宋氏興寧縣人年十八歸何二十歲夫故

矢志撫孤誓不二適姑歿親往築塋盡哀盡禮守節

五十七年卒年七十七歲雍正十年 旌

湖廣通志卷之七十二

